

16 barangan disenarai dalam skim harga maksimum musim perayaan

Published on: Tuesday, January 21, 2020

By: Winnie Kasmir

SANDAKAN: Sebagai langkah menyekat kenaikan harga barangan keperluan menjelang perayaan Tahun Baru Cina 2020, Kementerian Perdagangan Dalam Negeri dan Hal Ehwal Pengguna melaksanakan Skim Harga Maksimum Musim Perayaan (SHMMP) berkuatkuasa dari 20 Januari hingga 2 Februari.

Menteri Kesihatan dan Kesejahteraan Rakyat, Datuk Frankie Poon berkata semua peniaga dan pasaraya di daerah ini perlu mematuhi skim terbabit, yang dilaksanakan di bawah Akta Kawalan Harga and Antipencatutan.

Berucap semasa Pelancaran dan Tinjauan Skim Harga Maksimum Musim Perayaan Tahun Baru Cina 2020 di Pasaraya Besar Mydin, di sini, pada Isnin, katanya, tindakan tegas akan diambil terhadap peniaga yang gagal mematuhi peraturan-peraturan di bawah skim itu,

“Penentuan harga maksimum pengeluar, borong dan runcit dibuat mengikut kewajaran dan kesesuaian bagi penguatkuasaan kawalan harga yang lebih berkesan untuk memastikan harga yang berpatutan bagi manfaat pengguna dan peniaga.

“Bagi membendung kenaikan harga yang tidak munasabah oleh peniaga yang tidak bertanggungjawab, tindakan pengeluaran notis di bawah Seksyen 21, Akta Kawalan Harga dan Antipencatutan 2011 dilaksanakan ke atas mana-mana pihak yang didapati menaikkan harga secara mendadak dan ketara,” katanya.

KPDNHEP Sabah mengenal pasti sebanyak 16 jenis barangan pelaksanaan SHMMP Tahun Baru Cina 2020 berbanding 13 jenis barangan sebelum ini.

Kategori barangan harga terkawal terdiri daripada ayam, telur ayam, sayuran, barang kering, hasil laut dan daging babi selain penambahan barangan melibatkan cili merah, tomato dan ubi kentang import dari China. Katanya, pengguna boleh menyalurkan aduan kepada KPDNHEP jika ada peniaga yang tidak patuh, sama ada menerusi e-aduan@kpdnhep.gov.my, menghubungi 1800 886 800, menggunakan aplikasi telefon pintar Ez Adu, Whatsapp ke 019-2794317 atau hadir kemana-mana 73 pejabat KPDNHEP di seluruh negara.

Turut hadir, Pengarah KPDNHEP Sabah, Georgie Abas dan Ketua Pegawai Penguatkuasa Negeri merangkap Timbalan Pengarah KPDNHEP Sabah, Taha Julai.